

Kapitulo 19

Dios ta bendishoná, kura i libra hende di e number 666

Tur loke Dios ta eksigí di hende ta ku un propósito: pa hende por biba, ta pa hende ta bon, pero humanamente hende ta komprondé Dios malu. Dios ke bendishoná tur hende, pero ora ku e hende tende e kondishon pa e bendishon e no ta komprondé i ta rechasá e bendishon i ta sigui biba sin e bendishon di Dios mas i mas den miseria.

"Hende lo hòrta Dios? Tòg boso ta hòrta Mi; ma boso ta bisa, `kon nos a hòrta Bo?' Ku deismo i ofrenda. Boso ta maldishoná ku un maldishon pasobra boso ta hòrta Mi, henter e nashon aki. Trese henter e deismo den Mi mangasina pa por tin kuminda den Mi kas, i pone Mi na prueba awor den esaki, e Señor di ehérsitonan ta bisa, si lo Mi no habri pa boso e bentana nan di shelu i basha asina tantu bendishon ku boso lo no tin suficiente lugá pa pone." Malakias 3:8-12 BS

Dios no ke hasi nos dañó. Si Dios duna nos abundansia, sin kura nos di egoismo, esei no ta bendishon. Pasobra nos ta egoista di naturalesa i tur kos nos ke pa nos so, i mas nos tin mas nos ke tin i no ke reparti, Dios ke kura nos, siña e hende pa duna dor di deismo i ofrenda.

Deismo ta e dèximo, pues un di dies parti di e hende su entrada i ta e remedi pa hende su egoismo. E ofrenda ta e tèrmometer pa midí e keintura di nos egoismo. Ora ku un hende ta duna tiki ofrenda, su keintura di egoismo ta haltu; segun e egoismo ta baha, e ofrenda ta subi. Segun e egoismo ta bira ménos, Dios ta oumentá e bendishon ku mas entrada.

Un hende ku ta fiel den deismo i ofrenda nunca no por pasa miseria, pasobra su deismo i su ofrenda ta mará na e profesia di Hesus, ku e evangelio lo bai den henter mundu. Dios ta duna e fiel trabou, salú i forsa. Ora ku Dios duna un hende trabou, e hende no porta na kama malu, ken ta traha e trabou? Tampoko e no por ta suak, Dios ta dun'é forsa pa traha, nos tin eksperiensha di e bendishon nan aki.

1 Reinan 17:7-15. E biuda tabata tin un tiki hariña i un tiki zeta den su kas pa su ultimo kuminda pa e i su yu pa despues nan muri. E biuda a papia e bèrdad, e tabatin temor di Dios. Si e biuda a bisa e no tin niun tiki hariña i zeta, ora ku e lo a drenta bek den su kas e lo a haña e kònchi di hariña i butishi zeta blo bashi.

Hopi biaha nos tin un tiki sen pero nos no ke yuda un otro persona. Nos ta bisa nos no tin sen. Si nos ta aktua asina, lo no bai nos bon. E biuda i su yu hòmber Elias a keda kome to dia e miseria a pasa.

Tambe tin hopi hende ku ta bisa ku nan no ta duna diesmo i ofrenda, Paso esaki ta plaka pa pastornan kome. Ta bèrdad ku diesmo i ofrenda ta kubri e sueldo di esnan ku ta traha den e obra di Señor i tur otro gastu ku ta yuda pa e avanse di e evangelio. Malakias 3:10 BS ta bisa: "Trese henter e diesmo den Mi kas, pa por tin kuminda den Mi kas anto lo Mi bendishoná boso." Nos ta debilbé diesmo na

Dios pa e ta use den Dios Su obra di salbashon riba mundu. E hendenan ku ta dediká tur nan tempu den e obra no por bai traha otro trabou i nan mester biba di e obra.

E loke hopi hende ta bisa: "Ta plaka pa pastor kome" tin algu di bèrdat den dje, pasó kòrda ku Elias a bisa e biuda: 'traha un pan pa mi promé' i e biuda a hasi loke Elias a bisé, i Dios a bendishoná e biuda. Si e diesmo ku bo ta duna ta sirbi pa e hende di Dios por kome, Dios ta bendishoná abo. Loke ta mas importante ta pa tur loke hende ta hasi ta pa amor, e servisio di hende na Dios mester ta pa amor. Nos i e pastor ta duna diesmo pa amor na Señor.

Kórda ku e iglesia di Dios no tin doño riba tera. Su doño ta Dios; no tin un hefe riba e iglesia, ni un hende no ta bira riku sakando ganashi for di e iglesia. Tur desishon ta tumá den komité i despues tur miembro ta aprobá e asunto pa e por ta ehekutá. No por tin un kònkementu, i si kònkèl, e ta wòrdu deskubri. Pa e motibu aki, tur hende ta kuidadoso i ku temor di Señor hende ta sirbi Señor. "Ai di boso, eskribanan i fariseonan, hipókritanan! Pasobra boso ta duna un di dies parti di menta, enelda i komino, i boso a neglishá loke ta mas importante di e Lei: hustisia, misericórdia i fieidat." Mateo 23:23 BS. E kosnan aki hende mester hasi, i no laga e otronan sin hasi.

Hesus ta mostra ku diesmo mester ta kompañá ku hustisia i misericórdia i fieidat. Nos no ta kumpra reino di Dios ku nos diesmo i ofrenda; Dios kier yuda nos komprondé e salbashon den Hesus. "No montoná tesoro pa boso mes riba tera, kaminda mòt i frustu ta destruí nan, i kaminda ladron ta kibra dreña i hòrta; ma montoná tesoro pa boso mes den shelu, kaminda ni mòt ni frustu no ta destruí nan, i kaminda ladron no ta kibra dreña ni hòrta; pasobra kaminda boso tesoro ta, einan boso kurason lo ta tambe. Ningun hende no por sirbi dos shon; pasobra òf e lo odia esun i stima e otro, òf e lo ta leal na esun i despresiá e otro. Boso no por sirbi Dios i rikesa," Mateo 6:19,20,24 BS

Dikon Hesus ta kompará Dios i rikesa komo dos shon? Pasobra tur dos tin gran influencia riba hende. E hende ku ta salba tin Dios na promé lugá, promé ku plaka; esnan ku ta bai pèrdi tin plaka promé ku Dios.

Un sirbidó di Dios por tin rikesa? Si, pero e no mester sirbi rikesa, ta rikesa mester sirbi e hende. E hende mester tin Dios riba su kabes i rikesa bou di su pianan. Rikesa ta subi hende su kabes mashá lihé. Rikesa a trese desunion den henter mundu, parti rumannan for di otro. Ora mayornan muri, laga herensia, hopi biaha e yunan ta bira enemigu di otro. E plaka ta kousa di hopi problema den mundu. Tuma nota di e maldito droga.

1Timoteo 6:7-14, versikulo 10,11: "Pasobra e rais di tur malu ta amor pa plaka; i algun, den nan afan pa busk'é, a desviá nan di fe, i a hinka nan mes den hopi aflikshon. Ma abo, o hende di Dios, hui e kosnan aki, i sigui hustisia, deboshon, fe, stimashon, pasenshi i suavidad di kurason." Amor pa plaka ta rais di tur malu.

Plaka tin su efekto riba tur hende, ta Dios so por yuda nos pa skapa di e efekto di e plaka, dor di diesmo i ofrenda.

Ora ku un hende no por sigui e konseho di Dios, ta prueba ku e plaka ta afektando e persona kaba, pero si e sigui e konseho di Dios, e ta kura di su materialismo. "I E la bisa nan: `Mira bon, i warda boso di tur set di plaka, pasobra maske ku un hende tin abundansia, tòch su bida no ta su propiedat." Lukas 12:15

Dios ta Todopoderoso den tur sentido. Plaka ta todopoderoso den un sentido, Sin plaka bo no por hasi nada, bo no por kumpra i kon bo ta biba? Diabel sa esaki bon-bon. Ta pa e motibu ei, Diabel ta lastra e hendenan ku e plaka na perdishon. Pero e hende ku sigui e konseho di Dios lo ta salbá di tur destrukshon ku plaka ta trese ku n'e. Pronto diabel ta bai uza e plaka pa obligá e poko hendenan ku ta warda e mandamentunan di Dios i fe den Hesus. Revelashon 13:15-18.

Versikulo 17,18: "I pa ningun hende por kumpra òf bende, sino esnan, ku tin e señal, ò nòmber dje bestia, ò number di su nòmber. Akiden e sabiduria ta sinta: ken, ku tin inteligensia, konta e number dje bestia; pasobra ta number di un hende, i su number ta seis shen di sesenta i seis."

Diabel no por logra dominá tur hende ku religion falsu òf doktrina falsu. Pero su Ultimo tiru mortal riba henter humanidat ta e plaka. Lo e pone su seyo riba e plaka ku ta nòmber di e bestia òf e number di su nòmber 666. Ta solamente esnan ku tabata fiel den nan diesmo i ofrenda lo skapa e number 666. Dios ta laga nan so ku nan no tin plaka riba mundu i nan no tin mester di plaka mas pa uza aki no mundu, pasobra den e persiguishon aki Hesus ta bini. I esnan ku tabata duna diesmo riba nan plaka, no ta katibu di plaka i ku e diesmo Dios a montoná nan tesoro den shelu. P'esei hende mester ta fiel na Dios den tur kos, i risibi tur e bendishon nan, conforme Señor Su promesa den Malakias 3:10.

Ora ku Diabel pone su seyo riba e plaka, Dios ta libra tur ku a usa e plaka pa avansá Señor Su obra di salbashon. E hendenan ku no por duna dies porshento di nan entrada pa Dios Su obra, ora ku Diabel kué tur e plaka, nan lo laga diabel kuné? Si nos no por a duna, ora ku diabel kué tur bo entrada, siguramente e ta hiba nos alma tambe kuné.

Bo ta kere ku semper bo a koperá ku parti di bo entrada pa avanse di Dios Su obra, anto ora ku diabel ta uza e entrada di tur hende pa gana nan alma, ku Dios ta lubidá esnan ku tabata fiel den tur kos i e dèsimu tambe? Ta Dios so por libra nos di e number 666. Dios bendishoná nos i warda nos di tur malu i di e number 666.